

Кондак 1

Избранней от всех родов Пресвятей Госпоже Деве Богородице, благодарственная пения приносим Ти, раби Твои, яко прославила еси Божественный образ Твой чудодействием. Ты же, Всемиловитая Владычице, яко имущая державу непобедимую, от всяких нас бед свободи, да зовем Ти:

Радуйся, Владычице, иконою Твоею благодать и милость нам являющая.

Икос 1

Ангел множество и вся Небесная Воинства славят Тебе, Царицу всех, Богородицу. Ты же исполнила еси радости души наша милостивным пришествием к нам образа Твоего святого, в немже залог несомненный Божия благоволения и Твоего небесного заступления нам ниспослался. Темже радуящаяся, славословим Твое милосердие и песненно Тебе вопием:

Радуйся, Благословенная Дево, от всех родов Богом избранная и паче всех возвеличенная;

Радуйся, Небесная Царице, Господа Бога Мати и Творца всяческих.

Радуйся, яко Тебе вся Небесная Воинства величают;

Радуйся, яко Тебе вся колена земная Матерь Божию исповедуют.

Радуйся, яко предстоящи славней иконе Твоей, Самой Тебе Истинной Матери Божией поклоняемся;

Радуйся, яко силу Твою благодатную сей иконе обильно даровала еси.

Радуйся, Отрадо наша и дивное о нас попечение;

Радуйся, от нужд, печалей и бед непреложное избавление.

Радуйся, любви Божественныя явление;

Радуйся, чудес преславных совершение.

Радуйся, духа уныния и боязни отгнание;

Радуйся, духа радости и крепости стяжание.

Радуйся, Владычице, иконою Твоею благодать и милость нам являющая.

Кондак 2

Видящи Премилосердная Матерь Божия скорбное житие наше, немощи и болезни, благоизволи дати нам в радость и спасение, и от всяких бед и напастей ограждение икону Свою святую. Не умолчим никогда, Заступнице наша Преславная, о всех Твоих благодеяниях, да не будет под спудом свет чудес Твоих. Сего ради величаем Тя, возвеличившую род наш Твоим благоволением, прославляем благочестным пред святым образом поклонением и благодарственно вопием о Тебе Богу: Аллилуиа.

Икос 2

Разум недоразумевает достойно песнями духовными восхваляти Тя, Небесная Царице. Ты бо восхотела еси знамение Твоея благодати явити людям во иконе Твоей, в ночном бо видении многим болящим явльшися, Пресвятая Дево, повелела молебная пения совершати пред святою иконою Моденскою и омытися в находящемся близ церкви озере. Болящий же деяху с верою повеленная, чудесно исцеляхуся. Мы же, с любовию

прославляюще Тя, Помощницу нашу Всеизрядную, немолчными гласы вопием:

Радуйся, Своим пришествием нас обогащающая;
Радуйся, всех прибегающих под кров Твой приемлющая.
Радуйся, раны греховныя благоутробно врачующая;
Радуйся, праведный гнев Божий на нас Твоим молением скоро утоляющая.
Радуйся, терпеливых страдальцев дарами благодатными ущедряющая;
Радуйся, к покаянию нас призывающая.
Радуйся, грешных молений не отвергающая;
Радуйся, желания богоугодная исполняющая.
Радуйся, радость скорую подающая;
Радуйся, на смиренных призирающая.
Радуйся, врагов наших видимых и невидимых побеждающая;
Радуйся, любящая и чутящая Тя от всяких бед избавляющая.
Радуйся, Владычице, иконою Твоею благодать и милость нам являющая.

Кондак 3

Силою свыше обогатившися цельбоносною иконою Богоматере, приидите и видите Божественное сокровище, всем прибегающим дары чудес обильно подающее. Что убо воздадим Господеви, сицевое человеколюбие нам явившему, чудотворный образ сей, яко небесный дар, нам низпославшему и верных просветившему, вопиюще Ему хвалебную песнь: Аллилуиа.

Икос 3

Имеяй богатство милосердия неоскудное, от Пречистыя Твоея иконы токи чудес источила еси, Владычице, болящим исцеление, страждущим ослабу и всем вся полезная подавая. Мы же, памятуя выну покров Твой, молим Тя: Всемиловитая Госпоже, Дево Богородице, одержими печальми не остави до конца погибнути рабом Твоим, но ускори изъяти от настоящих скорби и печали вопиющих к Тебе:

Радуйся, принесением честныя Твоея иконы тьму лютых обстоятельств от нас отгоняющая;
Радуйся, пораженных различными недузи чудесно исцеляющая.
Радуйся, от врат смертных неисцельно болящих к жизни возвращающая;
Радуйся, горестию телесных страданий вечных мук избавляющая.
Радуйся, скорбьми грехи наша очищающая;
Радуйся, печалию немощи душевныя врачующая.
Радуйся, ожесточенно враждующих примиряющая;
Радуйся, прилоги врага отражающая.
Радуйся, во всяких скорбех и печалех небесную отраду в сердца наша изливающая;
Радуйся, от разорения, плена и лютыя смерти всех уповающих на Тя свободящая.
Радуйся, злосрадие страстей и похотей наших всемошным мановением укрощающая;
Радуйся, самых отчаянных грешников из рова погибели исхищающая.
Радуйся, Владычице, иконою Твоею благодать и милость нам

являющая.

Кондак 4

Бурю смятений и раздоров, врагами воздвигнутую в стране нашей, умири, Владычице, да не погибнем в беззакониях наших. Огради нас иконою Твоею от враг видимых и невидимых, и тако, укрепляеми Тобою, до конца живота своего вопием Создателю нашему: Аллилуиа.

Икос 4

Слышавше ближнии и дальнии о дивном чудеси святыя иконы Твоея, Пречистая Владычице, со усердием многим притекаху к цельбоносному Твоему образу, приемля от него дары неисчетных Твоих благодеяний. Темже и мы, аще и недостойни суще, со благоговением и радостию покланяемся сему чудному образу Твоему и достодолжно Тя песнями ублажаем:

Радуйся, свитче Божественный, в нем же перстом Божиим написася Слово;

Радуйся, от начала веков во главизну нашего спасения предъизбранная.

Радуйся, скиние, Духом Святым осененная;

Радуйся, Благодатная, всеми добродетельми преукрашенная.

Радуйся, вся ангельския чины превосходящая;

Радуйся, блаженное чрево, невместимаго всеми Бога вместившее.

Радуйся, яко млеко Твоим питала еси Питателя вселенныя;

Радуйся, Мати Препоблагословенная.

Радуйся, от небесных славимая и от земных хвалимая;

Радуйся, мира горняго первейшее украшение.

Радуйся, маслино, елеем милосердия нас умащающая;

Радуйся, чудо чудес Одигитрие, на путь спасения нас наставляющая.

Радуйся, Владычице, иконою Твоею благодать и милость нам являющая.

Кондак 5

Яко лучезарную звезду, чудотворную икону Матере Твоея показал еси нам, Господи: ибо, взирающе на образ Ея телесныма очима, умом и сердцем к Первообразней возвышаемся. О Пречудная Мать Света! Огнем небесным коснися смущенныя души моя и исполни ю веры непостыдныя, надежды известныя и любви нелицемерныя. Да всегда пою и славлю Тя, Святейшую Мать Всесильнаго Бога, вопиюще Ему: Аллилуиа.

Икос 5

Видевше преславную икону Твою, Пречистая, со умилением уразумеша вси неотступный покров Твой и милостивое о нас промышление. Тебя, Благоую Заступницу нашу, прилежно молим: заступи, покрый и соблюди нас от бед, озлоблений и падений греховных, осени благодатию Твоею, да отвергше горечь греха, сладость благочестия обрящем и, на истинную стезю добродетели и спасения наставляеми, зовем Ти:

Радуйся, яко чудес и целеб Подательнице;

Радуйся, у Господа спасения нашего Ходатаице.

Радуйся, иноков благоподвизающихся Всемошная
Покровительнице;
Радуйся, всех христиан вожденная Помощнице.
Радуйся, неразумных премудрая Вразумительнице;
Радуйся, целомудрия и воздержания незримая
Охранительнице.
Радуйся, скорая в бедах и печалех Утешительнице;
Радуйся, заблудших Наставнице.
Радуйся, всех немощных Целительнице;
Радуйся, грешных Споручнице.
Радуйся, погибших Взыскание;
Радуйся, нечаянная грешных Радосте.
Радуйся, Владычице, иконою Твоею благодать и милость нам
являющая.

Кондак 6

Проповедуют милости Твоя, Богомати, вси концы вселенныя,
ибо честным покровом Твоим покрываеши и защищаеши весь род
христианский, и, введуще Тя воистину помощницу сильну и
непобедиму, со слезами приносят Ти молитвы, да простреси к
Сыну Твоему Богоносная руке за люди Твоя, во еже избавити нас
от всех бед и напастей, да благодарне вопием Богу, Тобою нас
спасающему: Аллилуиа.

Икос 6

Воссия неизреченная благодать от цельбоносная Твоя
иконы, Пресвятая Дево, пред нею же со слезами припадающе,
молим: Всесильная рода нашего Заступнице и Помощнице, отжени
облак нашедших на ны искушений и всяких злокозненных действий
врагов наших видимых и невидимых, и мирное устроение
обуреваемым напастями даруй, на Тя бо все упование возлагаем и
умиленно Тебе зовем:

Радуйся, образ Твой чудотворный в утешение и исцеление
дати нам изволившая;

Радуйся, всемошным Твоим заступлением от бед нас
избавляющая.

Радуйся, искушаемым руку помощи простирающая;

Радуйся, во дни уныния надежду вечных благ
воодушевляющая.

Радуйся, от треволения моря житейского кающихся
спасающая;

Радуйся, всем потребным ко благочестию снабдевающая.

Радуйся, зависть и коварство на нас злых человек премудро
разрушающая;

Радуйся, лживых провидцев и суетная гадания посрамляющая.

Радуйся, чистотою Твоею чистому житию нас научающая;

Радуйся, окаменение сердечное умягчающая.

Радуйся, хладность душевную благодатно согревающая;

Радуйся, верных пастырей Святыя Церкви укрепляющая и
вразумляющая.

Радуйся, Владычице, иконою Твоею благодать и милость нам
являющая.

Кондак 7

Хотяши явити велию любовь Свою к людям, Человеколюбец Господь Тебе, Матерь Свою Пренепорочную, покров и защиту роду христианскому дарова, да будеши печальным утешение, скорбящим радование, отчаянным надежда, вечныя муки Своим ходатайством избавляющая и к небесному веселию всех приводящая, вопиющих непрестанно гласом хваления Сыну Твоему и Богу нашему: Аллилуиа.

Икос 7

Проповедник неизреченных чудес Твоих, Владычице, явился храм сей, святою иконою Твоею украшенный. Попущением бо Божиим, грех ради человеческих, все благолепие его некогда погибе, икона чудотворная рука безбожных изъята бысть, но милостию Божиею уцеле и паки возвращена в храм, идеже ныне честно пребывает. Мы же, неизреченному смотрению Твоему дивящиеся, радостно зываем Ти:

Радуйся, в годину напастей и испытаний чудотворную икону Свою во утешение нам сохранившая;

Радуйся, скорбные сердца наша вторым обретением образа Твоего возвеселившая.

Радуйся, новую милость и новую благодать сим в Церкви являющая и тем путь спасения показывающая;

Радуйся, осенением святых Твоя иконы злых духов мечтания от нас удаляющая.

Радуйся, непочитающих иконы Твоя святых яко прах от лица земли развевающая;

Радуйся, юродивую мудрость века сего посрамившая и ослепленных ею на путь правый наставляющая.

Радуйся, светом Христова учения тьму неверия прогоняющая;

Радуйся, временным наказанием невежд умудряющая.

Радуйся, прославляющих Тя прославляющая;

Радуйся, Твоим ходатайством грехи наша прощающая.

Радуйся, Твоим молением печали наша утешающая;

Радуйся, Тя на помощь призывающих и имя Твое славящих спасающая.

Радуйся, Владычице, иконою Твоею благодать и милость нам являющая.

Кондак 8

Дивное чудо, егда чудотворная икона Твоя, Владычице, с песнями духовными приносится в храм Господень. Торжествуйте вси, зряще несомую икону Царицы Небесных, от нея же токи чудес с верою приходящим источаются, недузи врачуются и скорби утешаются. Сего ради прославляя Бога, давшаго нам благодать таковую, вопием Ему: Аллилуиа.

Икос 8

Всем вся благая и спасительная даруеши от святых чудотворных икон Твоя, Богомати Пречистая, юже яко сокровище многоценное зряще, со гласом радования и благодарения зываем: Кто не ублажит Тя! О Мати наша Милосердная! Кто не воспоеет Твоя славная чудеса! И мы, грешнии, любовь к Тебе побеждаеми, отверзаем недостойныя уста своя на похвалу Тебе сщевую:

Радуйся, всежелательное всего мира зрение;

Радуйся, недвижимое веры благочестия основание.
Радуйся, всесветлое благодати познание;
Радуйся, жезле Ааронов, прозябший нетленне.
Радуйся, светильнице, на свещнице превышнем поставленный;
Радуйся, Лествице небесная, Иаковом предвидимая.
Радуйся, благородная отрасль Богоизбранного рода
Давидова;
Радуйся, палато Духа Пресвятаго.
Радуйся, огненный престоле Невидимаго Царя;
Радуйся, Честнейшая и Славнейшая без сравнения всех
Небесных Сил.
Радуйся, прекраснейшая всех дочерей человечестих;
Радуйся, воистину Присноблаженная и Пренепорочная.
Радуйся. Владычице, иконою Твоею благодать и милость нам
являющая.

Кондак 9

Всякое естество удивися неизреченному действию силы Твоея,
Дево Пренепорочная, егда многомощно свирепствовавшей холеры в
Косине и окрестных селениях ея приносима быша сия чудотворная
икона. Заступлением Твоим, Всемилостивая Владычице, недуги
отступаша, людие же, исцеление получиша, вопиют Богу:
Аллилуиа.

Икос 9

Витии многовещаннии недоумеют воспети по достоянию силу
благодати, Тобою иконе сей дарованною. Кая ли песнь
сладкопевца достойна будет восхвалити вся чудеса Твоя, — яко
принесением иконы Твоея во всяко место благодеяния различны
источаются, долгонедужныя и расслабленныя исцеляются. Человецы
же, Тобою тако помиловании, из глубины души зывают Ти:
Радуйся, Предстательнице к Богу, мир от бед спасающая;
Радуйся, милости сокровище многоценное нам открывающая.
Радуйся, безчисленныя щедроты всем подавающая;
Радуйся, почитати Тя нас научающая.
Радуйся, ко спасению и восприятию благ вечных
наставляющая;
Радуйся, нераскаянных грешников к покаянию обращающая.
Радуйся, хулителей святых православныя веры невидимо
карающая;
Радуйся, иконою Твоею, яко столпом огненным, мрак греха
отгоняющая.
Радуйся, от междоусобных брани охраняющая;
Радуйся, вражия козни расторгающая.
Радуйся, Русь Православную возлюбившая;
Радуйся, веру истинную в ней утвердившая.
Радуйся, Владычице, иконою Твоею благодать и милость нам
являющая.

Кондак 10

Спасения ищуще, к Тебе прибегаем, Милосердная Мати, и
чудотворную Твою икону ныне обстояще, со благоговением и верою
чествуем, ибо всем поклоняющимся Тебе скорое вспоможение
подаваеши и во иных градех и весех чтущих Тя полезное прошение

исполняеши. Темже, воспоминаая неисчетная чудотворения Твоя, вопием Всемогущему Богу: Аллилуиа.

Икос 10

Стена еси Ты, ограждающая нас от всяких болезней, всем с верою призывающим Тя в помощь, Пресвятая Дево Богородице. Ты бо, Владычице, младенцу зело страждущу, исцеление даровала еси. Сего ради, прославляя Твое Матернее милосердие, благодарственными усты вопием Ти вси из глубины души:

Радуйся, яко принесением иконы Твояе болезни лютыя прекращаются;

Радуйся, всем во всякой потребе вся полезная и благая подавающая.

Радуйся, добрыя обеты приемлющая;

Радуйся, призывающих Тя заступающая.

Радуйся, сумнящихся утверждающая;

Радуйся, супругом любовь и согласие подавающая.

Радуйся, матерей детородящих скоро и безболезненно разрешающая;

Радуйся, чад их благодатно охраняющая.

Радуйся, скорбным вдовицам и сирым помогающая;

Радуйся, пагубные удары грома и молнии от нас отводящая.

Радуйся, яко огонь, поядающий дома и пажити людския, росою молитв Твоих угашающая;

Радуйся, благая Домостроительнице, житие наше добре устрояющая.

Радуйся, Владычице, иконою Твоею благодать и милость нам являющая.

Кондак 11

Пение наше, аще было бы и тьмочисленное, не довлекло бы к достойному прославлению милостей Твоих, Всехвальная Владычице, яже непрестанно изливаеши роду человеческому. Мольбу безчадных супругов, пришедших к чудотворней иконе Твоей, не оставила тщетно, но даровала еси им милость деторождения. Обаче, да не неблагодарни явимся пред Тобою, по силе нашей похвальная восписуем Ти с любовью, вопия Богу: Аллилуиа.

Икос 11

Яко светоприемную свещу, зрим Твою честную икону, Пречистая и Препоблагословенная Дево Богородице. Невещественный же в душах наших возжигающи огонь любве к Тебе, Всеблагая, прими веру и усердие наше, направи на стези истины путь наш, умоли Господа и Сына Твоего, да спасет нас, имиже весть судьбами, да не погибнем в нераскаянии о грехах наших, и услыши моление к Тебе взывающих:

Радуйся, иконою Твоею нам благодееющая;

Радуйся, Матерняя щедроты Твоя на нас изливающая.

Радуйся, греховныя помыслы властно отгоняющая;

Радуйся, маловерных вразумляющая.

Радуйся, неверных смыслы просвещающая;

Радуйся, милосердие Божие разумети нам помогающая.

Радуйся, страх Божий в сердца верных влагающая;

Радуйся, о храмах Божиих попечение имущих духовною

радостью утешающая.

Радуйся, от сна лености нас возставляющая;

Радуйся, омраченных светом Богопознания и благочестия озаряющая.

Радуйся, блага земная, суетная и скоропреходящая презирати нас научающая;

Радуйся, к небесным и вечным сокровищам умы и сердца наша возводящая.

Радуйся, Владычице, иконою Твоею благодать и милость нам являющая.

Кондак 12

Благодать Божия, присущая святей иконе Твоей, Пречудная Царице Богородице, влечет к ней всех скорбящих и обремененных, и радость сии получивши от сего источника Твоих милостей и щедрот, благодарно вопиют Благих Подателю Богу: Аллилуиа.

Икос 12

Поюще Твоя чудеса, бывшая в древняя и настоящая времена, хвалим Тя, Богородице, яко неисчерпаемый источник милости, яко неистощимую реку чудес и, прибегая к Твоему всесильному заступлению, взываем, помощи Твоея просяще: буди нам, Всеблагая Владычице, покров и защищение и в день кончины нашея, и егда имамы предстати на суд Страшному Престолу Сына Твоего, да не постыдимся во уповании нашем, еже по Бозе крепко на Тя возлагаем, вопиюще:

Радуйся, любовь к Тебе имущим врата райская отверзающая;

Радуйся, на милость к нам грешным Господа преклоняющая.

Радуйся, на путь исправления заблуждающихся направляющая;

Радуйся, согрешающих покаяние милостиво приемлющая.

Радуйся, в дни скорби люди Твоя укрепляющая;

Радуйся, в час смертный тьму вражю от нас отгоняющая.

Радуйся, безболезненную и мирною кончину устраояющая;

Радуйся, вечнаго Царствия у Сына Твоего и Бога нашего

всем нам просящая.

Радуйся, Тобою нисходит к нам Божие благоволение;

Радуйся, грехов наших непоминовение.

Радуйся, от власти князя воздушнаго освобождение;

Радуйся, геенны вечныя избавление.

Радуйся, Владычице, иконою Твоею благодать и милость нам являющая.

Кондак 13

О Всепетая и Всемиловитая Мати, прими ныне молебное пение наше, пред чудотворнею иконою Твоею с верою и благоговением Тебе возносимое. Призри милостивно на веру и упование наше и всесильными Твоими молитвами избави нас от всякия напасти, болезни, внезапныя смерти, и сподоби в блаженстве вечном со всеми святыми хвалу Богу воспевати: Аллилуиа.

Этот кондак читается трижды, затем икос 1-й и кондак 1-й

Молитва ко Пресвятой Богородице перед Ея иконой, именуемой «Коссинская» (Моденская)

О Премилостивая и Пречудная Света Умнаго Царице! Достоинно славимая и праведно от всех горних чинов ублажаемая, яко без сравнения их превосходящая, Бога и Творца всяческих рождающая. Благодарим Тя о всех благодеяниях Твоих, яже благоволила еси явити нам преславным принесением чудотворных Твоя иконы. Кое благохваление пришествию Твоему сотворим, недоумеваем, точию удивляемся, величающе Твое милосердие, еже на нас показала еси. Темже мы, грешнии, со страхом и радостию припадающе к цельбоносней иконе Твоей, благодарственно вопием Ти: О Всесильная рода нашего Помощнице! Услыши нас, молящихся Тебе, и яви милость Твою; се бо, на Пречистый образ Твой взирая, яко живей Ти с нами Сущей, молим Тя усердно: не помяни множества грехов наших, но исполни во благих прошения, даруй нам вся потребная к животу и благочестию, избави нас от скорбей, бед и всяких болезней, наипаче же от смертоносных язв и пагубы, от навета злых человек и всякаго обстояния. Соблюдай и спасай нас благодатию Своею, Владычице, от тлетворных учений неверия и суеверия, от лукавых соращений. Сохрани нас и Отечество наше от всяких крамол, нестроений и злых развращений, врагами веры православней воздвигаемых. Сподоби же нас, Всеблагая Заступнице наша, благочестно житие сие земное совершити, христианскую безболезненную, не постыдную, мирную кончину получитьи и Небеснаго Царствия наследовати. Да всегда поем, величаем и славим Тя, яко Благоую Заступницу рода христианскаго, со всеми угодившими Богу. Аминь.

Память 20 июня/3 июля